

愚

齋

存

稟

愚齋存藁卷第五十四目錄

電報三十一

袁慰帥來電

張香帥來電

英京羅大臣來電

寄 行在軍機處北京全權大臣江鄂粵督帥皖東撫帥

寄 行在王中堂鹿尚書

寄 英京羅大臣

袁慰帥來電

寄行在軍機處

寄日本李大臣倫敦羅大臣

劉峴帥寄日本李星使電

寄行在軍機處北京全權大臣江鄂督帥山東撫帥

劉峴帥來電

張香帥來電

皖撫王灼帥來電

劉峴帥來電

寄行在軍機處江鄂粵督帥皖東撫帥

張香帥來電

寄行在軍機處

寄江鄂督帥

寄行在軍機處北京全權大臣江鄂閩粵督帥皖東

撫帥

寄行在軍機處北京全權大臣江鄂督帥皖東撫帥

劉峴帥來電

全權大臣幕府柏憲章來電

寄江鄂督帥皖東撫帥

寄巴黎裕大臣

寄華盛頓伍大臣

峴帥致英京羅大臣電

又

袁慰帥來電

慶邸李相來電

寄北京全權大臣

寄行在鹿尙書

浙撫余摺帥來電

劉峴帥來電

寄行在樞府北京全權江鄂粵閩皖東各帥

寄行在樞府並劉張袁各帥

寄行在軍機處江鄂皖東督撫帥

寄行在樞府北京全權江鄂川粵東皖蘇浙各帥

寄浙撫余摺帥

劉峴帥來電

寄湘撫俞虞帥

寄北京周玉山方伯

晉撫岑雲帥來電

寄劉峴帥

又

寄行在樞府北京全權甯鄂督帥

張香帥來電

劉峴帥寄英京羅星使電

鄂督張香帥致北京全權大臣電

劉峴帥來電

又

又

北京徐晉齋京卿周玉山方伯寄峴帥電

張香帥來電

寄北京李中堂周玉山方伯

寄江鄂督帥山東撫帥

英京羅使寄江督電

袁慰帥來電

寄張香帥

寄蘇撫聶仲方中丞蘇藩陸春江方伯

寄劉峴帥

寄北京李中堂

寄張香帥

寄北京全權大臣

北京周玉山方伯來電

寄北京全權大臣

張香帥來電

寄 行在軍機處甯鄂督帥

英羅使寄江督電

寄江督劉峴帥浙撫余中丞浙藩榮方伯

江督寄英羅使電

寄 行在榮中堂王中堂鹿尚書

寄西安端午橋中丞

寄劉峴帥

劉峴帥來電

寄行在軍機處總署北京全權大臣總署江鄂督帥  
寄行在軍機處北京全權大臣江鄂督帥

周玉山方伯來電

寄行在軍機處

愚齋存藁卷第五十四

電報三十

袁慰帥來電

光緒二十七年二月十三日並嶺帥  
香帥

各國既迭請宣布似未可全不理仍以由兩帥面  
交各領爲妥免至兩不討好俄日同利猶之豕豕  
同穴豕必難存日人狡黠當知此理且日請公議  
甚力似不至爲俄所餌杳兄何妨作爲傳聞巡詢  
小田察其詞色便可知矣英人向不肯代人受害  
而幸災樂禍由來已久宜稍留意

張香帥來電

二月十三日並致江閩粵川滇各督  
帥蘇浙皖贛東鄂湘粵各撫帥

接峴帥正月懿電謂變法復奏必宜督撫聯銜方  
可有益此論誠然人多尤善擬請峴帥主稿鄂省  
附名惟鄙意以仿西法爲主抱定 旨中采西法  
補中法渾化中西之見二語作主意大抵各國謂  
中國人懶滑無用而又頑固自大其無用可歎其  
自大尤可惡於是視中國爲一種討人厭之異物  
不以同類相待必欲蹂踐之制縛之使不能自立  
而後已此時非變西法不能化各國仇視各國之  
見非變西法不能化各國仇視中國之見非變西  
法不能化各國仇視 舉廷之見必變西法人才

乃能出武備乃能修教案乃能止息商約乃能公平財政乃能核實礦務乃能開闢內地洋人乃不橫行海外亂黨乃能消散孔孟聖教乃能久存應變者多宜有次第管見宜先辦者有九事一親貴游厯二游學各國三科舉改章四多設學校五西法練兵六專官久任七仿設巡捕八推廣郵政九專用銀元此九條最要而不甚難已足令天下人精神一振陋習一變各國稍加青眼其餘若多設行都設礦務總公司行印花稅酌改律例設課農專官各省推廣製造局鼓勵工匠各條相機量力

從容舉辨或謂西法僅學其皮毛仍無益處不知從古學問文章皆先求形似再求神似西法精蘊豈易造到能得皮毛雖不能自強已足自存彼迂謬無知沽名誤國之輩指摘詬病惟有置之不理其專論整頓中法者如另制官祿盡革部吏更定選法停止題本省減浮文掃除漕倉積弊准京城駐防各旗人任便居住寄籍等事須另擬數條另爲一摺若西法摺不能允則希冀舊法稍加變通耳竊謂當此危如累卵之國勢千載一時之事機宜先以第一義陳之 上前如不采納再及第二

義方覺稍盡臣子之心總之今日國土日蹙國權  
日奪羣強日逼同則存孤則亡決定不移更無他  
說若僅整頓中法以屢敗之國勢積弱之人才豈  
能除二千餘年養成之弊政以此而望自强久存  
必無之事也尊處已覆奏否大綱若何先請示知  
部文接到不久限期尙寬鄙諭稍覺駭俗祇以不  
忍中國坐待危亡痛心發憤竭誠傾吐已電請峴  
帥采擇統望蘊裁熟籌有無可采祈示

英京羅大臣來電二月十四日

得寒電遵晤瀾侯豐以私意相詢瀾云各國原勸

中國將俄約交駐京各使公議令江鄂議將該件  
交滬漢各國領事轉各使必有益等語此係瀾一  
邊之詞當否祈裁

寄行在軍機處北京全權大臣江鄂粵督帥皖東撫  
師二月十四日

呂使真電俄約事遵旨屢商外部彼總以效電爲辭  
詢以若允俄約各國如何彼云視允俄利爲斷滿洲鄰  
俄俄宜關心他國難詰責英德約與滿洲無涉又詢以  
俄如決裂不還滿洲若何彼云俄旣允各國撤兵歸地  
想當踐言可勿過慮昨又往切商仍堅執效電辦法又

詢以京約是否停議彼云未停唯格使因滿約屢未與  
議現京約最要在償款款有著兵可撤他事較易商德  
甚願早結云謹再密陳宣轉

寄 行在軍機處江鄂粵督帥院東撫帥

二月十四日

東京李使元電連日接劉張盛各電屬詢外部辦法據  
稱東三省俄已佔據本無須立約所以求立者因恐各  
國責令退兵還地保中國主權故思得約杜各國之口  
中若畫押各國講均沾之理自必亂起攘地中若不畫  
各國何能藉口格使乃謂不畫押各國必乘機侵奪另  
佔便宜理正相反殊不可解俄前謂逾期不畫卽決裂

現逾期六日尙無舉動其爲恫喝可知似不必過慮現代籌辦法惟有兩事一將約底交各國閱看公斷一無論俄如何要挾總答以此約關係太重兼各國勸阻萬不能畫請原諒以詞宣決絕語卻和平爲要不必多說致存糾纏亦不必用好言慰彼致乘隙而入又墮術中俄若不提亦不必向理論堅持定見靜以待之俟有舉動再商應付之法等語合電陳乞鈞奪宣轉

寄 行在王中堂鹿尙書

二月十四日

太晤士報主自京來述各國公議兵費八千萬磅允照我國書之意分作四五十年由國家立票徑還各國家

不特利息減省甚多卽省銀行現扣一款本利不止一  
萬萬至抵押必以有著爲度詢以俄約不畫有無耽擱  
據稱各國均願速了英美等已料理撤退只候賠款成  
議云

寄英京羅大臣

二月十四日

呂佳真電均轉格仍緊催畫押不肯刪改我堅持不畫  
樞擬令江鄂將俄約交領事有益否乞酌示並轉呂

袁慰帥來電

二月十五日兼致覲帥香帥

鄂元電悉變法一議節節中肯極佩啟處前擬疏  
稿於初六日排遞金陵計已登鑒多與鄂議同請

峴帥採擇策奏凱附銜名並祈飭錄拙稿轉寄鄂  
寄行在軍機處二月十五日

眞諭轉商後羅使寒電晤瀾侯豐以私意相詢瀾云各國原勸中國將俄約交駐京各使公議今江鄂議將該件交滬漢各領事轉各使必有益等語李使元電稱真屬商外部據稱日本前詰俄卽以探知立論但欲聯同各國似不如交與各領事轉電各外部較爲迅速云頃奉元電詢俄約當已密交各領事如何商辦迅速籌復刻詢英日領全文已由江督鈔交璧利南云應卽由江督電各領事聲明今因俄國力請中國照此約畫押但

不知各款中有無窒礙他國利權否故將約稿送交貴  
國察量等語則各國似有道理此事初冀俄自轉圜今  
格使又退照會似覲面難議四國均請照會駐京公使  
似不得乎此必得乎彼或照璧擬先由江鄂用輕筆交  
各領事代轉或照張袁所請將國書商改各節請英日  
代商或竟由朝廷諭他國出爲調停乞鈞裁

寄日本李大臣倫敦羅大臣

二月十五日

全權奏駐俄參贊佳電戶部忽招去云奉命各部十三  
會議將滿洲改作俄國省分可速電政府改款則萬萬  
不能目前尙可代設法俾得畫押外部已不管此事云

速商外部若果如是何以解之乞速示

劉峴帥寄日本李星使電

二月十五日

蒸電及復樞兩元電均悉承日政府推誠指示並  
許商各國設法以保中國權利感甚俄約已由敝  
處逕行密交各領請密達各政府此時中國自當  
堅持定見聽候公評惟俄現因久逾期限中國置  
之不理勢成騎虎俄戶部電已有絕交永踞之地否  
必須各國速發公論向俄排解俾爲轉圜之地否  
則相逼太甚竊恐激成戰禍請速商日外部乘俄  
尙未顯露決裂之前速約英美諸國向俄公論並

將俄約公評商辦情形仍望隨時電示爲盼

寄行在軍機處北京全權大臣江鄂督帥山東撫帥

二月十六日

呂使元電海奉使無狀中德未能浹洽彼尙不以公使論遇事僅通融商量密碼迄未弛禁彼國緊要之事不得不由他國館代電以冀消息靈通藉知虛實倘有宣露一被詰問將來更難措手凡電經外部畫諾由柏林逕發者儘可援引餘則務求秘密束縛情形懇祈鑒原爲叩宣轉

劉峴帥來電二月十六日

各咸電悉約係照各國所囑分交各領代達似可毋須再由敝處聲明請尊處轉致璧領分達公使外部致樞電如下真電悉盛京卿真電慮俄餌日一節當電李使密詢宗旨頃准覃電云約交領事外部謂好極惟請速辦當商各國設法以保中國權利密探宗旨一節據稱日爭俄約專爲保全中國並令各國勢力均平不願一國偏重貽害東方大局決無攘利之見等語竊思日倘受俄餌欲分三省利益或與三韓互換似不應力勸將約交各國公評各國力爭日本獨得利益各國豈能甘讓

此理似明云至俄約旣欲各國公評必須將約分  
交各國方有依據鈞處眞電屬令密交辦法最安  
已由敝處分別密致各領云

張香帥來電

二月十六日兼致劉峴帥陶方帥德  
靜帥袁慰帥王灼帥聶仲帥余擴帥

江翰電悉此奏鄂斷不敢主稿鄙人主意多鹵莽  
思慮多疏漏文筆亦艱澀仍請峴帥主持鄙人有  
見必吐有疑必爭有善必從有誤必改附於參贊  
之列可也濟稿祈先郵示其實變法有一緊要事  
實爲諸法之根惟言之駭人耳西法最善者上下  
議院互相維持之法也中國民智未開外國大局

茫然中國全局本有政事亦茫然下議院此時斷不可設若上議院則可行考宋磨勘轉官之法必有薦主十人明廷推之法則大臣皆與似可略仿之督撫由司道府縣公舉司道由府縣公舉府由州縣舉州縣由通省紳民公舉但不能指定一缺舉員多者用之京官除樞垣不敢輕議外都院堂官由小九卿翰詹科道部屬公舉司員掌印補缺由本部候補者公舉每一缺舉二三員候欽定豈不勝於政府數人之心思耳目乎推之各局總辦亦可由局員工匠公舉惟武將不在內蓋今

日營哨官並不知兵不能舉也流弊亦不能無總是利多害少賄賂情面庸劣尸位之弊必可絕矣姑妄言之請諸公略本此意而思一可行之法則幸甚

皖撫王灼帥來電

二月十六日兼致峴帥香帥慰師

頃連電樞云昨見各使電及邸相咸奏俄參贊胡惟德等佳電俄戶部之詞竊思決裂則決裂改屬則改屬耳何必寬予期至十三天何必使外部置迹戶部出頭算意則無非以恫喝圖畫押且實因我有主持此事之人故不惜以虛聲嘗試而不知

其言雖肆其氣實饒矣今既有改滿洲爲俄省之  
言我卽據之以布告各國且即可因其戶部欲爲  
我轉圜告以我因各國阻止之故屢以其情相告  
雖俄一味拒絕猶不肯宣示是我原未嘗得罪俄  
主今旣說到盡頭只好據情布告請其見諒云似  
理直而詞婉卽日本外部所說第二層辦法也俄  
再不鬆口則只有徑自宣約一著日英於此著意  
三占從二不當因德人一面之詞遽畏阻而墜俄  
術中德與英日干係情形不同故立論活動也總  
之改屬之說能說不能行旣背公約又干英日之

大忌又與其辦成東省鐵路利益大損應任其虛  
張聲勢可也又云頃電發後旋知鈞處已飭江鄂  
將約交各領事並飭籌辦法蘆籌堅定佩甚竊謂  
約既交出原可靜憑公斷卽一面用張袁策更宣  
國書託英日代商似更周妥以宣約示我之不懼  
仍以婉商令彼得轉圜收場當易乞鈞裁等語尊  
電璧說從緩固是但文內宜著中國主權一語方  
覺不失人亦不失己又似應普告各國勿令其嫉  
而偏袒乞酌裁

劉峴帥來電二月十七日兼致張香帥陶方帥王

灼帥袁慰帥聶仲帥余摺帥

鄂銑電悉議院意美法良但恐事多阻格未能照行此次變法爲中國治亂興衰一大轉機關繫極鉅香帥博通今古貫澈始終經濟文章海內推爲巨擘非由香帥主稿斷難折衷至當萬望勿再客氣主持辦理坤如有所見亦當知無不言以備採擇頃將濟稿及子培代擬稿又余瑨所擬四條寄鄂務希察酌核辦感甚此外尙有續擬之件成稿後卽寄

寄 行在軍機處江鄂粵督帥院東撫帥二月十七日

日本李大臣諫電昨以胡參贊電密屬羅李使探詢英

日外部頃李使諫電如下咸電告加藤答稱滿洲久已佔據今乃自改作俄省恫喝中國足見其技已窮且交涉事外部不管所管何事舉動可笑中國儘可置之不理等語查東三省不永踞俄曾明告各國答日廷亦然俄倘食言各國後必責俄似宜暫置不問俄前踞津榆鐵路聲言路當屬俄車站悉更俄名旋仍交英非改俄省即可永踞也當否乞卓奪宣轉

張香帥來電

二月十八日兼致嶺帥

頃接滬信新黨因俄約事在張園集議初次尙無謬處二次集議數百人滿口皆流血自主自由仇

俄等說張園懸有各國旗幟當場將俄旗撕毀並欲立仇俄會等語查此等議論舉動不過借俄約爲名陰實是自主黨會黨藉端煽眾以顯國會權力能把持國家政事蓄謀甚深甚險現各國公約請禁立仇視洋人之會已頒 嚴旨該黨若立此會違 旨挑畔子俄人以口實俄事愈難轉圜爲害不細日外部詞宜決絕語確和平二語峴帥意甚許可鄙見亦以爲然張園之舉正與相背請峴帥密飭滬道設法阻止以消亂萌並請杏翁籌酌設法阻止爲妙盼示復

寄 行在軍機處 二月十八日

小田切面交節略頃奉外部大臣電開日本政府頃獲中俄約稿卽向英國商議辦法一面仍爲表白日本意思並保持日本一切權利起見業已電飭駐俄欽差面告俄外部云本欽差已將貴外部三月二十五日所聲言轉達日本政府頃奉電飭轉告貴外部日本政府意思現在未便詳告但日本所見與此次貴國所答不同此爲至憾等語密達劉張亮鑾等因卽乞電達 行在俄約萬勿照允爲盼云

寄江鄂督帥 二月十二日

張園集議仇俄之舉毫無道理香帥所慮極是可否請  
峴帥速刊告示嚴禁聚眾議事仇視外人並密飭袁道  
設法阻止

寄 行在軍機處北京全權大臣江鄂閩粵督帥皖東  
撫帥

二月十九日

日本李大臣嘯電昨午外部與海陸軍大臣會議甚久  
又各大臣在伊藤宅內申刻集議亥刻始散聞日俄有  
開衅意頃倫敦電俄派兵船六十一艘來東內鐵甲七  
艘快船七艘又倫敦司丹達多報論日俄交涉有俄外  
部明言拿定主意當與日本兵械相見之語查曰本海

軍共二十六萬噸俄在東方海軍現約十萬噸添派多  
艦當亦僅足相抵勝負之數固未可知與我利害所關  
亦難預定惟當靜以待動不事張皇暫作局外旁觀爲  
此時要著至東南沿海關繫英美各國似可無虞愚見  
附陳當否乞鈞奪宣轉

寄 行在軍機處北京全權大臣江鄂督帥皖東撫帥  
二月十九日

美京伍大臣巧電東約遵商美廷設法頃外部云俄使  
來復奉伊國諭俄與中國訂約原爲退還東三省起見  
仍守保全中國疆土之說並無他意今旣有謠言允不

再強中國俟日後再商等語外部又稱俄使已交節略  
爲據竊謂俄約既不相強東三省似應開門通商以杜  
覬覦請代奏並轉慶邸傳相峴香兩帥

劉峴帥來電

二月十九日並致香帥

滬嘯電悉事在租界非示諭能禁已電滬道密籌  
商阻仍望杏翁派人吹散

全權大臣幕府柏憲章來電

二月十九日

日昨相託法使電其政府向俄排解並電裕使面  
懇外部頃聯芳密稟相云畢使面告俄已允不偏  
迫畫押並允三省俄兵陸續撤回云

寄江鄂督帥皖東撫帥二月十九日

行在局電昨樞面奏開封瀕河險工林立渡黃亦不易  
仍議由正站孟津渡黃不至開封候全權信定期壽州  
擬聯銜上請先 啟鑾沿途聽京信云東三省事不定  
俄日恐啟衅似未可 啟鑾乞速電奏

寄巴黎裕大臣二月十九日

巧電已轉聞俄允不逼畫押並允三省俄兵陸續撤回  
確否請詢外部速復

寄華盛頓伍大臣二月十九日

巧電照轉俄使交節略爲據是何言語三省俄兵能否

撤回開門通商恐俄不允

峴帥致英京羅大臣電

二月十九日

俄雄視五洲惟英是忌承英關顧勸中不畫俄押  
無論俄如何舉動英當以公論相助並商各國排  
解將約公商中遂仗英之助堅持不畫現俄戶外  
部謂中信英日讒言從此應絕交滿洲改作俄省  
並諭格使公約加勁與中爲難俄被日詰卽好言  
相慰若仗英再加詰問俄雖忌必懾於眾論庶可  
將約聽各國公商日外部已電駐俄日使告俄外  
部日本所見與俄所答不同爲憾並向英商議辦

法務請切懇英與日向俄公論並格外見諒囑薩商各國將公約曲爲減讓勿墮俄狡謀惟仗執事力籌補救禱切並盼電復

又二月十九日

中國伏莽未靖保護責任更重軍火爲巡緝要需公約禁購聞各國多主五年日本倡約兩三國主兩年中需軍火多向德購料物多向英購禁限過久緝匪無具於英德商務亦多窒礙現仿西法力行新政此後中外必能融洽務乞力商減少年限並轉裕呂照商爲盼

袁慰帥來電

二月十九日並致峴帥香帥

現聞法國由西貢安海線至廈門有無其事速查

滬兩效悉日俄交兵無論孰勝我必失地大局必危宜亟請英美德設法排解共保和局但慮日人先發制人乘俄水師未集而薄之請三公速籌良策壽州 啟鑾之請恐未能允姑稍待續報

慶邸李相來電

二月二十日

現聞法國由西貢安海線至廈門有無其事速查  
復

寄北京全權大臣

二月二十日

法海線安至廈門去春總署囑畢使向電局商辦曾允

其線端准至鼓浪嶼接入大北公司局內應由法政府  
先與大北議妥並與華電局訂定報價合同方可傳遞  
電報乃該線不待商妥現已到廈昨擬三條交大北與  
彼商議並已函呈鈞處請告畢使務須照廣西東京陸  
路接線會同派員與電局訂立簡明條款以免他人效  
尤

寄 行在鹿尙書 二月二十日

俄約未定三省未還北方豈能安枕 回鑾似宜暫緩  
免受脅制鈞意何如

浙撫余搢帥來電 二月二十日

接西安孫道效電此間榮藩有革戍字樣香帥已將廩帥力保全權有劉榮可減之說等語查榮上年有迭次保教勦匪公牘有案可稽今年籌墊解付英法新舊教堂償卹款項尤爲出力以後尙須續籌實於教案有益可否將此各情由尊處挈銜會電全權希核復爲盼

劉峴帥來電

二月二十日並致香帥慰帥

濟皓滬效電悉日俄備兵似皆虛作聲勢現伍使電俄有不再強中國之說情勢又異 啟鑾後再聽京信無此辦法慰帥得有確信見示後再行酌

辦

寄 行在樞府北京全權江鄂粵閩皖東各帥

二月二十一日

東京李大臣等電頃外部加藤言本日俄使來說俄本擬撤東三省兵因立約一節中國頗多窒礙俄不便令中國爲難現將此約作爲罷論東三省事仍照以前辦理業已通知各國云云鐸詢何謂以前加答卽指未議約以前並稱此事謬轎已久今俄允撤約和平了結甚爲幸事近民間謠傳俄日將開戰殊不足信等語屬電

陳宣轉

寄 行在樞府並劉張袁各帥

二月二十一日

東京李大臣號電加藤又言聞璞科第告李相東約不  
畫俄將增索首禍重索償款殊不知約歸公議俄何能  
獨操其權各國又豈聽俄怨俄旣撤約目前雖暫安  
靜以後用他術誘惑不可不防日本此次竭力幫助當  
蒙中國見信俄若再有誘逼情形事可否隨時密示彼  
此商妥再行答復免墮術中或商英亦可均請斟酌辦  
理等語並屬電陳加又言俄頃通知各國語略相同惟  
告德則謂誘逼中國訂約現有別國從中阻撓以後不  
必用此策云云宣轉

寄 行在軍機處江鄂皖東督撫帥二月二十一日

小由切面交外部電開駐日俄使昨將俄政府來電而  
交本大臣內開俄國與中國議訂專約原爲漸行撤兵  
交還侵地起見乃聞中國甚有難色俄國已定意不向  
中國索訂此約惟有照前次宣布之言信實辦理以俟  
事有轉機等語駐俄欽差所電俄國官報之言亦與此  
同飭卽轉達劉宮保電達 行在東三省一事貴宮保  
極力辦理以致俄國爲此言爲大局賀之惟恐將來再  
有隱謀仍希貴宮保加意防範隨時電示敝處此爲至  
盼切叩

寄 行在樞府北京全權江鄂川粵東皖蘇浙各帥

二月

二十一日

二十日路透專電云十五日俄政府行文於各國略謂中俄訂約原因彼此交好故有此舉今觀外人情形以爲此舉似有累於中國則非本政府之素志故亦不逼其簽押且嗣後亦不再議然辦理東三省事務則仍照前告諸國之明文云

寄浙撫余摺帥

二月二十一日

十九交全權電 旨前撫劉前臬榮衢州滋事均嚴飭地方彈壓切實查辦其賠卹各款余已奏結該撫臬雖係該管上司衢州相距較遠卽應得處分亦不至革職

永不敍用之重該王大臣等務當切實磋商力顧大局  
云我等若再會電全權須預備與各使閱看但指籌款  
恐尙無濟請公查明保教案據主稿電示弟當列名轉  
達

劉峴帥來電二月二十三日

外人屢欲運洋鹽入口圖侵權利有謂尊處知之  
甚詳尙祈密電詳示印度鹽法並祈錄示爲禱

寄湘撫俞虞帥二月二十三日

奉效電後卽託領事電懇法使轉圜適奉 諭旨教案  
全結應免置議全權派員往商法使彼謂前辦聯銜照

會衡案尙未結今得漢口領事電知已妥結渝撫自可免議云

寄北京周玉山方伯

二月二十三日

冬電承示鹽漕常稅全抵賠款最爲妥當惟常稅自可歸併洋關折漕採辦亦尙易辦鹽課鹽釐能否仍照撥釐五百萬章程由各省撥交海關分還以免外人干預近日洋人紛紛運鹽進口峴帥頗慮其嘗試乞詢鷺賓密示兵費聞八千萬磅商民賠款截至西四月止定數確否償款定而後撤兵似宜預籌免再擔擱

晉撫岑雲帥來電

二月二十四日並致峴帥香帥

煊二十一日在平陽途次受篆任重才絀深懼弗勝  
舉隨時訓誨各國議論並乞時示俾知辦法叩  
禱

寄劉峴帥二月二十七日

全權奏各使單開續辦外官處分廩帥鶴帥永不敘用  
景帥遣戍磋磨後俞得免松改革留劉改革惟浙藩榮  
銓革戍未能磋磨殆以英使與傅相不甚洽故法案易  
商而英案難減據榮電當時皆中丞做主實屬無辜波  
及已請恩方伯代求鈞處設法成全可否乞告孫領事  
速電薩使如不能全免或可改輕以昭平允此非公不

居齋文集

卷五十四

三月

三

能援手矣

又二月二十七日

印度鹽法已鈔寄大概就場徵課亦不易辦洋鹽進口必須禁止此次賠款注意鹽務常稅漕折三項究竟各省鹽課鹽釐是否實有一千五六百萬兩淮究有若干若盡以抵償無礙大局否

寄行在樞府北京全權甯鄂督帥

二月二十八日

伍使沁電賠款送商外部謂宜訂一總數由各國自派如不妥請萬國公會評斷各國約索美洋三百兆美二  
十五兆已電柔使轉商各國輕減各國允減美必遞減

至如何攤還須後酌香帥請勿禁運軍火之器料美可  
從惟須各使商允請轉慶邸傅相峴帥香帥宣轉

張香帥來電

二月三十日並致峴帥

據鐵路漢局比公司總管地亞孟德面告鄭道聞  
有英人奧利德承辦開封至南京鐵路已經定議  
之說此路果定則將來盧漢幹路借款之利息必  
至無著須歸 國家墊給卽比公司按照合同應  
得之餘利亦歸無有關係甚大求爲查明等語查  
中國鐵路以盧漢爲幹倘幹路未成先造支路則  
幹爲支弱全局受損開封南京之路似未宜卽行

議辦所傳是否屬實望卽電復

劉峴帥寄英京羅星使電

二月三十日

中國財匱已久出入統計前已歲短一千六七百萬卽不增用已慮年虧一年應還洋債歲至二千數百萬後難爲繼今復遭此大難貧困益甚以後整理一切需費已繁又須加以各國賠款爲數甚鉅若罄原有之項以爲抵債之需則辦事無費何以立國卽謂理財法有未善祇能次第改變操之過蹙轉慮激而生事有礙商務爲今之計非籌增款之法不能濟目前之急非洋貨加稅免釐照洋

藥併徵無從增籌鉅款北方拳匪未亂之先盛聶  
兩公在京與總稅司議加洋稅已有成說坤亦與  
聞去秋英德駐使曾與盛京卿論及謂舍此不能  
爲國實係篤論向來洋貨完釐商嫌局卡留難

國家難得實際歸關併徵兩有裨益此後還款愈  
多鎊貴當難復賤鎊置洋貨自應照時估價烟酒  
器皿等項前因洋商自用免稅今多售賣亦應區  
別徵免以期悉照公允此次之亂承英曲諒重敦  
睦誼俄約又承英助得作罷論無非顧全中國以  
期振作厚意頃鏡宇電德外部云加稅德以爲然

聞英不允當竭力調停或籌一折中法以金抽稅  
計可暗加釐云云以金抽稅卽按時估價所謂無  
增無減今欲籌款非加稅無以爲計加稅之後一  
切政治興革有資地方興旺與英商務亦屬有裨  
若慮稅重銷滯華民用洋貨已慣購洋貨又均係  
有力之家亦斷無慮銷滯此事非懸英始終幫助  
照允中國實難支持務乞諳商並擇要電呂商德  
贊助禱切

鄂督張香帥致北京全權大臣電

三月初一日並致行在樞府

江督劉鳴紳

二十五日敝處電英德美日各駐使商外部輕減  
賠款分年攤還免借銀行作保勿礙中國財政及  
勿禁造軍火機器物料兩事羅便豔復電云徑電  
譯致瀾侯瀾云免禁造軍火機器物料卽遵諭電  
令薩使照辦至賠款確數均未查出英不多索定  
數必較少聞各國總數約在六十兆鎊其餘各節  
俟確數定時方能議及等語伍使勘復電賠款外  
部謂宜訂一總數由各國自派如不妥請萬國公  
會評斷各國約索美洋三百兆美二十五兆已電  
柔轉商各使輕減各國允減美必遵減如何攤還

須後酌勿禁造軍火器料美可從惟須各國商允等語查軍火器料英美既允他國或可照允至賠款總數羅云約六十兆鎊伍允美洋三百兆李使電云東報共六千三百萬鎊大致相仿約需五萬萬兩商減恐不易惟盼分年免利作保不苛則中國尚有生機將來恐須請公會評斷德相宣言旣有不令公司牟利之言總以免借銀行爲要義

劉峴帥來電

三月初一日並致香帥

鄂贛午電悉上年十二月初英員何利德持電領函來見函內謂該員受怡和洋行聘擬往安徽查

勘礦務該洋員面稱擬赴安徽湖南一帶查勘鐵路並非查察礦務當囑何利德此事能辦與否應與盛大臣商議並函復霍領知照目下曾否與杳翁議辦旣礙幹路似以緩辦爲妥請杳翁酌核並乞電復

又三月初一日

昨因償款數鉅非加稅無可籌措電羅使力商英外部請公查取坤致羅三十電摘電全權並望公別爲籌設以冀有成

又三月初三日

償款事洋人議論僉謂美國派兵無幾索款照英  
核計爲數實多奧日比義用款更少而亦索鉅款  
中國不向切實駁減別國償款更難減少所言甚  
合事理請電全權酌辦

北京徐晉齋京卿周玉山方伯寄峴帥電

三月初三日

東電敬悉賠款單尙未交昨法德英日本四使言  
截至西七月朔止索償四萬五千萬兩如不借債  
由我分年扯長加利攤還約歲償三千萬則三十  
年還清歲償一千五百萬則六十年還清許再商  
議至因鎊貴加稅似可商辦鹽課釐常關漕折作

抵係赫以此取信外人之意內惟近洋關之常關  
須歸稅司監收若鹽課釐則可以他款作抵如皖  
鄂鹽釐抵稅舊案惟抵款驟難設法縱內外力求  
節省恐難節出如許鉅款則房捐印花稅當逐漸  
籌辦擬仍先從加稅籌商望促盛大臣速來

張香帥來電三月初三日

致鄭道電悉大治造水泥此乃地方官創興地利  
便民考工之事鄙人創議多年屢與各洋商議有  
合同已有成說應歸鄂省主辦不能另設公司至  
要至禱尊處如有華股儘可附入惟另設公司則

萬萬不可

寄北京李中堂周玉山方伯

三月初六日

據東北公司云德國兵官現定造一行軍電線兼通德律風自京都西北經南口而至長城循華局張家口線路而行約一百華里不日卽興工等語未知何意晤德使或參贊時請一詢之

寄江鄂督帥山東撫帥

三月初七日

前讀鄂電九款大綱已定又聞峴帥已將所擬各件寄請香帥主稿無任欣佩疆臣同志朝廷易於決斷一妙也疆臣有權能說卽能行二妙也慰帥微電以兩帥

現列參政與他省分際不同擬改爲分奏如分奏而大意相同亦妙慰帥奏稿請甯錄示一分

英京羅使寄江督電

三月初七日

三十電並樞電遵敦商瀾云洋貨釐稅併徵深合事理鄙見亦同惟事大節繁議成必累月經年恐於湊集償款緩不濟急且釐稅併徵後外銷款是否由部指撥如外省另立名目重徵何以預防其弊中國變法需款必多如將加稅盡供償款將來何以爲整頓之費等語豐答以加稅本係修約應辦之事發議在先可見並非專爲償款惟事逢其

會加稅愈不容緩查中外通商章程以洋藥釐稅  
併徵爲最善今將洋貨仿辦事雖繁瑣一經英廷  
倡允各國相從款卽有著毋慮緩不濟急外銷一  
項江帥自己籌及洋藥釐稅併徵後並無另設名  
目銷徵之舉洋貨可亦無疑江帥本謂若罄原有  
以抵債則辦事無費加稅後政治興革有資與貴  
爵所謂以爲整頓之費正合瀾意頗動云俟電商  
薩使後再談豐答盛囂兩公與總稅司講求此事  
極熟惟望薩使奉有英廷照允辦理訓條俾有成  
議曷勝禱懇祈鑒並轉樞垣

袁慰帥來電 三月初八日並致峴帥香帥

撤兵尚早 回鑾無期變法中有必須急辦者不妨先行數事不必專候 回鑾務使中外士庶咸知 朝廷決不頑固決不仇洋必可有益和局將來 回鑾亦多安穩請兩帥會奏時附片切請先行可望邀允

寄張香帥 三月初八日

前因鐵路需用水泥而開平各礦均已售絕擬由鐵廠鐵路籌款在治購機開辦因資本難措有鈞處昔年委辦水泥之李德願附股本乃屬鄭道稟商凡此等事能

自辦不用洋商更好適當罷論

寄蘇撫聶仲方中丞蘇藩陸春江方伯

三月初九日

舊漕未動新漕難收糧道並未預商漕船猝到北方開運無期局棧添造亦來不及前經電牘請速截止在案頃承電諭已飭商局查明泊浦漕白糧五六萬石遵卽通融搬貨設法收棧但恐州縣及代辦行店不顧大局聞風紛至則是自貽伊戚敝處實無法再收大約新漕年內斷不能運一切蝕耗仍請州縣自行設法務乞飛速通行賞糾公誼

寄劉峴帥

三月初十日

袁道述法領事欲派兵輪赴九江聞畢盛與全權甚懼應否電傳相商止京電詢鈞處奏緩科場確否乞示

寄北京李中堂

三月十一日

江浙新舊漕約百萬石聯軍退後年內恐不及全運河駁船通倉如何情形擬先運舊漕三十餘萬石京倉如無恙或由軌路接至京倉將來卽由唐沽上車運京何者爲妥乞預籌電示

寄張香帥

三月十一日

電奏稅釐課統加一倍以抵償款有盈無绌直截痛快洋稅加倍必做得到其餘我皆可自定也

寄北京全權大臣

三月十二日

江督寄羅李使佳電昨英使電鄂督此次賠款各國索現銀四百五十兆中國借票祇能售六七折須向銀行借六百兆方得此數現銀分三十年還每年須還本利約三十兆等語如此核計共需九百兆視俄德法爲少又倍查派兵來華日本爲多而索賠款視俄德法爲少又弛禁軍火料物力助不畫俄約無非爲中國留餘地俾使振作自強豈第中國臣民同深感奮亞東大局實永賴之今英日因索取現銀而使中國加受數百兆之虧商民脂膏全盡從此無振拔之機所得利者不過數家

銀行於英國日本國家毫無所益殊爲不值償款索現中國萬難支持中既不支於亞東大局卽有所損竊思日本英國多派軍隊原寓助華之意首執牛耳無容多讓祈向外部切商請其電達珍田薩使敦勸各國毋索現銀並將賠數減少由中國分年攤還此事與商務大有窒礙現電李羅商日英若日英兩國合力勸止更可得勁務望力圖盼電復云宣轉

北京周玉山方伯來電三月十二日

德國擬借京西北線搭軍電德律風託廢午樓詢  
瓦帥德使均稱不知近與德法兩提督商允由京

至正定抵晉界淮派華生附彼電房專打明碼電  
望公速派人來京商辦和議將竣惟賠款尙未合  
攏公竟惄然不北上耶盼切

寄北京全權大臣

三月十二日

江督寄羅使佳電昨薩使電鄂督此次賠款各國索現  
銀四百五十兆中國借票祇能售六七折須向銀行借  
六百兆方得此數現銀分三十年還每年須還本利約  
三十兆等語如此核計共需九百兆視賠數加一倍在  
華商務英國十居七八商務之盛衰全視地方之貧富  
此次賠款英國索數較他國獨少照他國總數核計尙

不及十分之一又復弛禁軍火料物允商加稅凡爲中國計無微不至商民同深感荷今若因索取現銀而使中國加受數百兆之虧從此商民膏血全盡無論洋貨土貨皆力不能盡辦商務大壞實非英國之利且索現各國均沾累商英獨受損以十不及一之賠款害十居七八之商務損已利人尤爲失計祈向瀾候切陳利害通盤籌畫請其電薩敦勸各國毋索現銀並將賠數減少由中國分年攤還中國尚有振興之望英亦享商務之益關係兩國實非淺鮮並電秩庸設法商美轉勸各國萬勿索現均盼電復云宣轉

張香帥來電三月十三日並致峴帥慰帥

鄂省斷不敢主稿久已屢次聲明分奏而大意相同方見公論九款內有數條只是一類不足以盡大綱合其次數條之法數條益處稍多耳湯蟄仙稿請索速寄濟歌電云宜變法先行數事不必俟回鑾字字精切緊醒眞見忠君愛國之忱請峴帥具奏時附片切請

寄行在軍機處甯鄂督帥

三月十三日

頃接李使初七函稱頃有呈復樞電因電文太長錄請尊處由滬代發文曰質電敬悉遵向外部加藤聲謝并

商詢一切據稱東三省併入公約俄復電不允是否在  
未撤約以前若在照會各國撤約之後乞將日期詳示  
至俄約何條關係最重前有外部電告江鄂兩督奏飭  
全權照會俄使不收一事俄約關係此件文內均已備  
詳至預爲立約地步代籌妥計交涉事件變動極多斷  
難預料惟當隨時因應設俄有何舉動隨時告知卽當  
代籌若無舉動無從籌畫總之俄不索立約中國斷不  
可商俄立約并不可使預備立約之心爲俄人窺測爲  
至要鐸詢東三省何時可歸還加答償款定後京津撤  
兵中國即可照會俄國請撤東三省兵看俄若何回答

再商辦法加又告各使互商償款內俄開有鐵路損害  
賠款自指東三省鐵路而言俟償款單交出請飭全權  
照會詢問東三省所有損失應賠之款是否均在鐵路  
損害賠款之內看如何答復等語查外部意在勸我不  
必急求還地將來還地亦不必另立約俄前已布告各  
國永不踞東三省將來或俟京津兵退或俟損失照賠  
後俄終不能不還地且俄旣將鐵路損失列入償款東  
三省事隱已併入公約再加照會詢問證實其事則各  
國撤兵後請俄撤兵得以有詞俄若不撤我告各國彼  
自當以公論詰俄至照會詢問一節并宜按公約辦法

照會首領公使不必照會俄使俄自不能索我立專約  
外部并囑償款互商尙未宣布此節務必秘密但東三  
省現在情形如何未能深悉暫緩收地若有窒礙可否  
隨時將情形詳示俾商外部免誤事機若無窒礙或卽  
照外部所言辦理伏望鈞奪又上月三十加藤曾言江  
鄂曾言電商將東三省開門通商當時答以於約事無  
益昨江督復電詢已答以現在此事日本意見并無不  
合鐸詢如中國辦理此事各國意見如何俄能不阻撓  
否加答各國自無不願之理地屬中國俄何能阻撓等  
語如鈞意定計辦理請電示再與外部詳商併附陳宣

轉

英羅使寄江督電三月十三日

佳卦電均導致瀾云分年攤還以中國現在財力  
每年能還若干以若干年爲限應詳覈列表方能  
擬議將來收發是否設局或由銀行經理如借款  
現還爲費雖大可免各國干預中國財政是大好  
處祈權衡至當東三省按津約本已通商今俄兵  
未退重申前約恐亦徒託空言等語

寄江督劉峴帥浙撫余中丞浙藩榮方伯

三月十四日

十一懲辦各省人員 電旨內衢案都司周之德著斬

立決浙江巡撫劉樹堂著革職永不敘用飭令回籍布政使榮銓著發往極邊充當苦差衢州鎮總兵喻俊明金衢嚴道鮑祖齡著革職發往極邊永不釋回衢州府知府洪思亮著革職永不敘用十三宣電樞云南洋接慶邸初七復電榮銓事現與竭力磋商或可免成改爲永不敘用請電全權如薩使可允減准照岑春榮之例辦理頃接樞願復電命轉全權大臣聞榮銓事經竭力磋商可免遭戍改爲永不敘用如能再商減止於革職更好請酌定已請 旨准將十一 上諭更正發鈔云俟接全權復電再達

江督寄英羅使電 三月十五日

元電悉照二十五年戶部核結以入抵出每年實  
短銀一千六七百萬兩此最確數商加洋稅能照  
前年所議值百抽十五亦僅彌其闕縱再將用款  
竭力裁節進項設法增籌不過歲得千數百萬可  
抵各國賠款似此辦理中國猶可勉力整理以副  
英國厚望是以賠款必須懇英力助商減並不索  
現中國商民最苦遠遜各國原收各項賦課已覺  
苦累斷不能照殷富之泰西辦法若因攤還賠款  
于預財政必致民不聊生尤爲萬萬不可惟仗大

力請商東省開通係三省全境許各國共享路鑛  
工商雜居一切利益與津不同何時可辦并再商  
詢

寄行在榮中堂王中堂鹿尙書

三月十八日

赫德付還洋款本息表以丁酉收數二千二百七十四  
萬兩爲則除一成經費外實收二千四十六萬餘兩併  
徵藥釐在內表內每年約佔不敷三四百萬不等尙有  
撥留製造出使各經費故添撥釐金五百萬以補之戊  
戌收二千二百五十萬己亥收二千六百六十餘萬爲  
最足壬寅後須還二千四百餘萬照己亥收數除支經

費略有所餘但稅務司算帳不肯以一年盈餘遽爲定數加稅未能猝議有西人密談明示以償款出之加稅斷非所願惟有就其所索鹽漕常稅子之使知的款有限藉可商酌寬期減利應由全權告以歲入不過八千萬舊債須還二千四五百萬新債只可還一千五百萬分五十年清本利共還七萬二千五百萬約合一萬萬鎊准將常稅歸入海關鹽漕兩項照釐金五百萬辦法撥交海關轉給可無干預之虞聞商民賠款尚不在內恐須另籌現款此後國用不及四千萬矣若照全權條電須交三千萬則國用止留二千五六百萬矣光緒四

十一年後舊債減至二千萬方可騰出四百萬如新債  
須加似亦須加在十三年之後至將來加稅及各項理  
財須留爲練兵自強之用彼旣不願指此懸款我亦不  
必提起以絕其奢望乞鈞裁

寄西安端午橋中丞

三月十八日

調鄂欣賀何時起節捐輸爭減不成政體公電各省極  
佩然欲盡一須杜融消只有請設一總局收捐統歸戶  
部總收分解可規復原數而捐可日旺盍與大農商之

寄劉峴帥

三月十八日

京電隨到隨轉尊慮鹽務一節甚是惟加稅猝難就議

海關付還洋債表藥釐併已算入每年約估不敷三四百萬故添撥七處釐金以補之請再確查藥釐提開未還洋債有無案據示知釋念

劉峴帥來電

三月十九日

各洋項洋照現無磅價核計每債年約應還二千一二百萬二十五年貿易總冊除船鈔外洋稅藥釐共有二千六百萬照此核算應多四百萬海關洋債表請速寄示

寄 行在軍機處總署北京全權大臣總署江鄂督帥  
三月十九日

德京呂使效電洋貨加稅并將免稅者酌抽輕稅者酌增按照洋藥稅釐并徵之法辦理無論值百抽五抽十  
統以金交納按時估價果能辦到所增當甚鉅以金交  
納辦法約有五端一貨物在原造地方購價之數二該  
貨由原造地方販至中國海口所需車船運費之數三  
該貨保險費駁船費及一切商家經手等費之數四以  
上三項共成若干總數作爲貨值之數照此核算抽稅  
均以底帳爲憑五稅金每日所收若干卽交各銀行代  
存按日計息既可得有餘利且免將來付洋債時用銀  
買金磅抬價折耗之虧惟各海關火耗平餘全免似應

稍加津貼以免辦公竭蹙方能永無流弊查此次賠款過鉅借債虧折太多擬將償款四百五十兆兩勻分十年照各國應得之數逕付各國國家如能不加利息更妙倘或稍加利息卽在四五釐之間所付之息亦不過百兆零數七折借債可省三百餘兆兩乃爲合算時事所迫不勝憤急愚見備擇云宣轉

寄行在軍機處北京全權大臣江鄂督帥

三月十九日

美京伍使皓電迭請美先減實數爲各國倡外部密告如先減恐招各國疑惟有切電柔使力勸各使美允大減廷窺美意可減四分之一但視各國如何方定勿索

現一節美謂暫緩提恐各國聞之不允減云宣轉

周玉山方伯來電

三月十九日

賠款事各使意見未定美使昨談以四萬萬五千萬之四釐息計之歲須付一千八百萬再加付本一千萬須每歲付二千八百萬現雖以鹽課釐常稅作抵仍應節省他款抵此課稅據戶部言內外竭力節省只得一千五百萬所差尙多加稅事現正商詢尙無頭緒貢院被拆驟難脩復考試一條亦未議妥

寄行在軍機處

三月二十日

闢門取士宜先首善京電貢院被拆驟難脩復不特秋  
闢難舉會試亦恐不及長江既多會匪各直省未能一  
律舉行似不如展至來年將順天貢院脩復一起開辦  
以免秋試紛歧春闢停待是否有當乞鈞裁

愚齋存橐卷第五十四